

Ақталмаған үміт

Рақымбек, Тұрдалы қарттың немере інісі, ағасын біраздан бері қонаққа шақыратын. «Асықпай келіп, бір жеті – он күн аунап-кунап кетсеңіздерші жеңешем екеуіңіз. Әрі бой жазар едіңіздер, әрі – өзіңіз бұрын илеп қалған терінің пұшпағы емес пе – маған ақыл-кеңес берер едіңіз» дейтін. Бірақ қарт сылтау айтатын, соңғы жылдары ол, ауыл іші болмаса, ошаң етіп қашыққа шықпайтын болып алған-ды. Уақыт шіркін бір орында тұра ма, енді ойлап отырса, қойлы ауылға ат ізін салмағалы төрт-бес жыл айналып кетіпті-ау. Бұл Рақымбекті сыртқа тепкені емес, бір жағынан, сақарғанның, шау тартқанның салғырттығы болса, қала берді, күнделікті күйбеңнің кесірі. Баяғыда, шопан ата таяғын әлі Рақымбекке бермей тұрғанда, күні-түні мал соңында жүріп байқамаған екен, бұ қарекеттің қиыны үй айналасының митыңы, от басы, ошақ қасының михнаты екен ғой? Әлде қолы босағанның кейін сақтық ойламай, үй айналасындағы шаруаға бірден бой алдырып өзі қатө жіберіп алды ма? Адам не нәрсені күйтесе, соның құлы ғой – енді қазір ауылдан аттап шыкса қара шаңырақты жау шауып кететіндей, ойсыраған шаруасы қайтып қалпына келмейтіндей көрінеді де тұрады.

Қолындағы баласы да тентек бота сияқты тележіген қырсыздың өзі болып ер жетті. Әлде туғалы қомына жүк түспеген машығына қоса әкесінің тірі жүргенін малданып, оқсамай жатқан істі көре тұра қартының тыныш отыра алмайтынын пайдаланып сөйте ме екен. Әйтпесе өзі шөпір, басқа шаруаны тындырмай-ақ қойсын, жаман машинасын салдырлатып олай шауып, былай шапқанында Жайықтың ең тоғайынан қыстық отынын түгендеп алуына мүмкіндігі мол ғой. Бірақ мойны соған да жар бермейді. Оның орнына қолы босап кетсе, не жата қалып қорылға басады: бәлен күн ұйықтамай от кешіп, аяғынан сабылған сарбаз мұның садағасы кетсін, не өзі сияқты кілең желбегей жігіттердің ортасын тілеп, «ала қағазбен» киіз, кілем сабауды, «көкмойын» құшақтауды армандап, жоқтап тұрады. Ал енді әрі ұйқының реті келмей, әрі қыдыра алмаса, қазан-ошақтың, келім-кетімнің тауқыметінен аяғы майысып әрең жүрген келіншегін қыжыртып, қайткенде де онымен шатасатын ілік іздейді. Қаладағыша азды-көпті тиынды сығырлағып жамбасына басып отырған жоқсың, ауылда тірлік еткен соң, аяқтай жүрген малсыз күнің жоқ. Алайда тұяқ біткен жерге бейнет, оның қамы қоса қонады. Тұрдекеннің әлгі қазір

жынын шақырып бұркылдап отырса, қазір жадырап, домбыра сабап, айқайға баса жөнелетін тентексүрей баласы мұның бірін білгісі, мойындағысы келмейді. Сөйте тұра оқта-текте: «Әйда, қосағасы, таста бәрін, көштік қалаға!» – дейтінін не қыларсың! Осы жасының ішінде бір балаға не қол жұмсап, не қатты сөйлеп көрмеген Тұрдекен мұндайда амалсыз күледі. «Әй, шырағым-ау, сенің басыңда ми бар ма осы! Сен ғой жалқау шөпірсің, – сенің жалақыңнан менің пенсиям көп. Сонда біз қалада қайтіп күн көрмекпіз?» дейтін...

Рақымбекке шопан таяғын өз қолымен табыс еткеннен кейін Тұрдекен оның қамын жатса да, тұрса да ойлап, мазасызданып жүрді. Ол бала әкесінен ерте айрылған-ды. Сол әкесіздіктің, сес көрмегендіктің кесірі ме, ол да төрт құбыласы түгел кісіден бетер салғырт, онысына қоса үлкен алдында мінезінің сынықтығы жоқ дөкір болып өсті. Бертін есейе келе тағы да басқа «өнер» үйреніп, бір жерде табан тіреп тиянақты еңбек етуге мойны жар бермей зырқияланып жүрді де, ақыры әскер қатарына алынды.

Ал енді бір ғажабы – сол жақтан Рақымбек малжанды болып оралды, «мен енді қой бағам» деп айқайлай келді. Әскер қатарында өткен екі-үш жыл қырсыздың қырын шығарып, әбден адам етіп жібереді деген түсінік бар екені белгілі, – Тұрдекен інісінің мінезіндегі өзгеріске қуанды. «Қай әулие аян берсе мейлі, дұрыс берген» деді. Әйтсе де, жөргегінен қолында өскен бала емес пе, Рақымбектің әлгіндей құлшынысына құлай сенген жоқ, «өткінші жел шығар, дыз етер де басылар» деп күтті. Бірақ інісінің талабы басылмады. Ақырында ол Тұрдекенді жеңіп тынды – қарттың демалысқа кетер шамасында, соның алдында ғана түскен келіншегін куә ете отырып, бата сұрады. Амал жоқ, қарт көнді; бір есептен, кешегі берекесіздің бойында бабасының қанының оянғанына да иланайын деді. Енді бұрынғысынша «ұятқа қалдырып жүрмес пе екен?» деп қауіптенбеді – шаруашылық басшыларына қолқа салып, беделін қолденең тартып, таяғын тек немере інісіне ғана беретінін, жібін өзі жалғап келген шопандар әулетінің бұдан былай да тұйықталып қалмауын қалайтынын айтты.

Қорықса қорқып жүрген Тұрдекеннің өзі, шаруашылық басшылары мал бағамын деген жас жігіттің талабына қарсы келуші ме еді, сөйтіп Рақымбек шопан болып шыға келді. Аз уақыт қарттың көмекшісі есептеліп жүрді де, кешікпей отарды қолына алды.

Рақымбектің қартты отар басында жиі көргісі келіп, көп қолқалағаны да әсіресе сол билік өзіне тиген алғашқы жылдар. Бұрын сыралғы емес істен жүрексінген-ді, көмек қажет еткен-ді, онысы шет тілек емес қой. Ол кезде Тұрдекен де қайт етпейтін. Бір жағынан, інісінің алғашқы қадамын қадағалағысы келіп қам жесе, екіншіден, көзін ашқалы

айналысқан ісіне қимастықпен қарайлай беретін. Өз үйіндегі бірлі-жарым тұяқтай емес, қоралы қойдың тек қарасын көріп «шәйт» дегені тынысын кәдімгідей кеңітіп жіберетін. Қарттың сол еңбегіне орай Рақымбек те дүрмекке ілесіп кетті, әйтеуір, жаман аты аталған жоқ. Бұған Тұрдекең, әрине, қуанды, «апырай, басы қараның бәрі игі» деп еді бұрынғылар, бұ тентек те ел алдында еңбегін жарқыратып көрсетіп, шын азаматқа лайық үрдіс танытар ма!» деп, үлкен үміттеніп қалды.

«Бейнет түбі – зейнет» демекші, Рақымбек ол азды-көпті төккен терінің қызығын көрді де: дәулеттілердің санатына ілігіп мал айдады, көлік алды; іргелі жиынға қаймықпай кіретін, сыбағасы сақтаулы тұлғаға айналды. Бірақ осыдан кейін-ақ ел аузындағы Рақымбекке арналған мақтау сөз сирей берді. Сосын, желдің бағытын өзгертердегі мінезі сияқты, бір уақыт сөз атаулы сап болды да, кешікпей азаматтың абыройына нұқсан келтіретін жіңішке де суық қауесет жүгірді. Соның бірі «Рақымбек арақты бөшкелеп ішеді екен» деген алып-қашпа еді. Тұрдекең әуелі, өзінің қапелімде елең ете қоймайтындығына басып, мұны өтірікке сайған, әлгі хабар өшудің орнына өрши түсті де, ақыры жария болды. Бұл жай қартты күндіз күлкіден, түнде ұйқыдан айырды, зәбірлеп, елдің бетіне сынық қарайтын етті; Рақымбектің отарына қарай аяқ басудан қалдырды. «О заман да бұ заман ішімдікке бой алдырып шектен шыққанның үйірге қайтып қосылғанын көрмедім» деп түнілді қарт.

Бірақ соңғы кезде, әсіресе осы биыл жаз, Тұрдекең әлсін-әлі ойға қалатынды шығарды. «Қой, бүйтіп әншейін тоң-торыс жүре бергенім келіспес, одан да барып, не істеп, не қойып жүргенін өз көзіммен көрейін. Оған менен артық жаны ашитын кім бар? Әлгі бөтелкеге осалдық көрсеткенмен, істеп жүрген еңбегіне көңілі адал болса, онысын көрейін, үлкендігімді танытып ұялтайын, ақылымды айтайын. Ал түзелмекке кеткен іс болса, мұнысын көрейін» деген. Қарттың Рақымбекке соғып қайтқысы келуінің тағы бір себебі қызына, Тұрдекеңнің сүт кенжесі Рабиғаға, байланысты. Рабиға қаладағы қазақ балаларына арналған пансионда тәрбиеленіп, осыдан бір айдай бұрын он жылдықты тәмамдаған-ды. Үйге соғып, аз күн демалды да, мектебіне қайта кетті. Кемпір-шал, әке-шешесі, қызының білім алғанына қуанғанымен, ол аттанғанда көңілсіз қалды. Ата-ана қай кезде іштен шыққан баласына *жәбірдің шалдығы* ойлайды. Ел қатарына іліксін, адам болсын деп жанын салады ғой. Соның ішінде әсіресе қыз балаға байланысты алаңы көп: табиғатында осалдау, жолы жіңішке тірнегінің ұрымтал сәтті жіберіп алса қор болатынын, тағдырдың талкегінде кетуі мүмкін екенін біледі. Шынында да, не қолы жетпей, не қолы жете тұрса да жалқаулық пен салғырттықтың салдарынан оқымай қалған

қыздардың зар жылап жүргендері аз ба. Тұрдекең мен кемпірі де Рабиға жайлы: «Қалада оқыды ғой, орыстың тіліне де ауыл балаларына қарағанда жетік шығар, мұғалімдері ылғи мақтайтын, – бір лайықты оқуға түсіп, үлкен маман болар-ау» деп дәмеленетін.

Міне, бұлардың сол үміті жер болып қалды: Рабиға кластас жолдастарымен бірге жаңадан ұйымдасқан алыстағы бір кеңшарға қой бағуға кетпек екен. Аузында әрмен қарай оқу жайлы әңгіме жоқ, тіпті, осы кезге дейін тимей келген ұзын шашын да қырқып, кесірленіп, белсеніп алыпты. Әсіресе анасы байғұс қолында «қатырмасы» жоқ кісінің түбінде қор болатынын айтып, көз жасын көмекке шақырып көріп еді, «Мама, мен қор болмаймын, одан қорықпа; қазір жастар мал бағуға жаппай жұмылып жатыр, оқуды сырттай оқитын боламыз; бұл сіз айтып отырғаннан гөрі қызығырақ өмір» деді қызы. Кемпір-шалдың сағы сынып, жүдеп қалды; Рабиғаның «сырттай оқимыз» дегенінің өзіне шүкіршілік етті. Тұрдекеңнің өзі де, кемпірі де малдың айналасын, әсіресе қой күтімін, қасиетті тірлік есептегендерімен, оны қыз балаға лайықсыз көретін. Бірақ, амал қайсы, енді Тұрдекең отарға барып, бір есебінде, өзі шет қалғалы бері төбе көрсеткен өзгерістерді аңдағысы да келді. Қала берді, қызы жайлы Рақымбекпен ақылдаспақ, алда-жалда Рабиға: «Осы бағытым бағыт, малшылықтан басқа кәсіптің қажеті жоқ», – деп жатса, оны осы ағасына, Рақымбекке, маңайластыруды, үйге жақындатуды ойластырмақ.

Қарттың осы толғаныстарымен кеңшар басшысының ұсынысы дәл келе кетті. Басшының онысы қулығы екенін Тұрдекең көп кейін түсінді. Сәтінде қолда билігі бар жас адамның шаруашылыққа бұрын еңбегі сіңген кәріге көрсеткен ілтипатына ғана сайған. «Ініңізге барғыңыз келсе, жеңіл мәшинамен апартып салайын» деп еді директор.

* * *

Қартты інісі қуана қарсы алды. «Тұрдекең келіп қалды ғой!» деп айнала жүгіріп, абыр-сабыр болды. «Әйда төсеніш сал, әйда іргені тұр, әйда сусын даярла!» деп үсті-үстіне бұйрық тоғытып, келіншегінің зықысын алып жүр. Даусын қатты шығарып көп сөйлейтін, маңдайы тар, шықшытты, дене бітімі ықшам жігіт еді. Оңі Тұрдекең сияқты ақсұр болатын, көп тотықпапты. Жазғы жайлауда, кеңшар орталығынан елу-алпыс шақырым жерде, сол тұстан қырға қарай басталатын үлкен құмның етегінде отыр екен.

Рақымбек ағасының есендігін сұрап жатыр.

– Жеңешемді неге ала келмедіңіз? – деді Рақымбектің келіншегі Жұмабике.

— Жеңешен, шырағым, бұ жолы үйден босап шыға алмады. — Түрдекең ризашылықпен жымып қойды, — Екеуміз бірдей кетіп қалсақ, бәрінен бұрын әлгі екі жаманның бабы табылмай, қарындары ашып қалар деп қорықтық. Сиыр сауатын, мал өргізетін адам жоғы өз алдына. Бұ күнде жастар ет пен сүтті керек етпейтін болды ғой...

— Ал қанша боласыз? — деді Рақымбек. — Әуел бастан келісіп қояйық... Бәлен жылда бір келгенде он шақты күн жататын шығарсыз?

— Он күн қайдан жатайын, шырағым, үйде де шаруа бар ғой, — деді Түрдекең.

— Жарайды онда, бір жетіге келісейік. Бір жетіден бір күн бұрын жібермеймін!

Жұмабике де күйеуін құптап жатыр. Сүйек бітісі қыз кезінде де сорлы емес еді, қарт көрмегелі бері мықтап семіріп, сарықарын тартып қалған екен. Шолақ танауы тәмпіліп, бұғағы салбырап, бұрын да қоныр өні семірген соң ірә қарақошқылданып, маң-маң басады. Бұл өзгеріске қарттың көңілі тойды: денесі тым шағын, қимыл-қарекеті ұшқалақ, қарсысындағы кісі сауалын аяқтамай жатып жауап бере бастайтын әйел баласын ол онша ұнатпайтын. Қазір енді Жұмабикені жұмсақ жанармен шолып отыр. Қартқа келінінің бойындағы бір ғана нәрсе ұнамады. «Көптің көзінен қашық бола берсін, бірақ жас адам ғой, неге бойын күтінкіреп жүрмейді екен?!» деп ойлады. Әйтсе де, Түрдекең қанша қипыжықтағанмен, келіншектің түймелері жарама-жартылай түсіп қалған өңірі қомақты көкірегін түгел жаппай-ақ қойып еді.

Рақымбектің біріне бірі тете төрт ер баласы даладан абыр-сабыр кіріп, аяқтарының шаңымен төрге төселген көрпені таптай, қартқа сәлем берді.

— Бәрекелді, мыналар шетінен адам болып қалыпты ғой, жүдә!... Таудай жігіт болың! — деп жатыр Түрдекең қуанып.

— Несі жігіт болсын, — дейді Жұмабике. Содан кейін: — Анау үлкеніміз, — деп балалардың ересектеуін нұсқап көрсетті, — әлі жетіге іліге алмай жүр. Екі-үш ай толмайтынына қарамай-ақ биыл күз оқытайық десем, мына ініңіз көнбейді, көмекші керек дейді.

— Ойбұй, қарақтарым-ау, бұдан не көмек тиіп жарытады әзір?! — деп күлді қарт.

— Жоқ, ата, тиеді... Атқа міне алам, қой да қайыра алам, — деді Нұрболат танауын тартып қойып. Кезінде Түрдекеңнің аузынан шыққан есім еді. Сүрініп-жығылып жүрген кішкентайдан өзге екі бала да бұл сөзді құптағансып, біріне бірі жымындай қарап қойды. Кенет кенженің алдындағы қарасирақ та батылданып:

— Ал мен бұзауға міне алам, бұзау деген бар ғой, ол тек зымырайды! — деді.

— Дұрыс...

— Мен мотоциклмен сонау шағылдың арғы бауырына барып келе қояйын, аға, — деп өтініш айтты үй иесі. — Әлгі Сағын қосын сонда тігіп еді, сізбен бірге болсын. — Жігіт есіктен айқай жететін шамада, үйездеп жатқан отардың арғы жағында, көз ұшында, көрінетін биік шағылды нұсқады. — Өзіне көптен кісі соққан жоқ, — бөтелкені бұзбай жұтқысы келіп алаңдап отырған шығар.

— Жоқ, шырағым, тырп етпе, ешқайда барма, — деді қарт. — Ол малдың адамы, өзің сияқты оның да балалары жас, қолы қысқа деп естігем. Қызметтің кісісін алаң етіп, ырғалып-жырғалып қыдырып жүрген маған да жарамас. Жапан түзде жалғыз үй отырсың, қасыма ешкімді алмадың деп мен сені сөкпеймін, қысылма.

Рақымбек: «Бұ қалай болды?! Әлгі сізді алып келген шөпірді де кідірте қоймап ем, ең болмаса қара көбейтіп отыратын...» — десе де, қарттың сөзінен аса алмай, көніп қалды. Түрдекеңнің бірсөзділігін, қайталағанды ұнатпайтынын білетін. Далаға шығып кетіп, пышақ жанығыштап, үй иесінің мейман келгендегі үйреншікті қамына кірісті.

Жұмабике қымыз бен шұбаттың жоқ екенін айтып, қайнағасына жолдан келісімен айран ұсынған болатын. Бұл күнде елде жоқ шұбатты сөз еткеннен не тынады, ал қымызға Түрдекең зәру емес еді: ол бір биеден қол үзбейтін. Қойдың қатығын — көптен аузына тимеген асты — рахаттана жұтты. Рақымбек далаға шығып кеткен соң, көп ұзамай түрулі іргеге жүзін бере теріс айналып, жатып қалды қарт.

Кенет бір көк шыбын қарияның құлағының түбінен әрлі-берлі өтіп, тікұшақша азынап кетпей қойды да, Түрдекең басын оқыс көтеріп алды. Үй ішін шолып шықты. Осында келіп түскелі ол айналасына дұрыстап көз салмаған екен, көңілі пәс тартып, қарыны ашып қалды. Киіз үйдің ішінде неше түрлі қымбат дүние тіреулі тұр: кілем, текемет, тысы асыл көрпе-жастық, біразы жинаулы. Осы дүниенің көзге көрініп тұрғанының бәрі дерлік кір, лас — күтімсіз еді. Есіктің қыр көзінде, жерде — жабылмай қалған қыруар ыдыс, кішкене үстел үсті де ат-көпір; ол маңға, тіпті, жолап болмайды: ұйлығысқан, түтінше ұйтқыған көп шыбын.

«Апырай, мыналар... жап-жас бастарымен қайтеді бұ?!.. Басқа есіне келмегенмен, ыдыстың бетін жаппай ма?!» деп құңк етті қарт. Қолын бас жағына созып еді, газеттің жыртындысы ілікті.

Түрдекең бір мызғып ояғанда шәй келді. Қойлы ауылдың кәдімгі ірімшік-құрты басым, нан жағы қатыңқырап қалған қоңыр шәйі еді. Жұмабике абысыны беріп жіберген дәм түрлерін де алып келді дастарқанға, төрт бала соған ойысты. Бірақ қонақ аузына түйір салған

жок, тұнжыранқырай отырып шөл басты. Рақымбек жанында тұрған манағы үстел астына қол жүгіртіп, шыны шылдырлатып еді, қарт үн-түнсіз қолын сілтеді.

— Сонда да... бөтелкенің көңілі қалмасын... — деді үй иесі. Мөлдірдің біреуінің тығынын ашып, шәй кесеге толтыра құйды; бөтелкемен соғыстырып, тастап жіберді. Содан соң қалған арақты үстел астына дік еткізді де, ол да қолын сілтеледі.

Дастарқан басы әңгіме Рабиғадан басталып, соның төңірегінде біраз сөз болды.

— Оқытқан мұғалімдердің, мектептің директорының не ойлағанын!.. — деп реніш білдірді Тұрдекең. — Қой бағуға мектепті тәлтіректеп әзер бітірген ауылдағы жастар жетпей ме?! «Қалада оқып жатыр, орысша да тілі ерте сынды, әлгі жоғарғы оқуға түсетіндермен таласқанда, әйтеуір, төменшіктемей, тең тұрып таласады ғой» деп екі сыбағалы болып жүргенде қойшылыққа, ұл демей, қыз демей, қоралап айдап!.. Әлгі директорына атақ, мақтау сөз керек болды дағы, әйтпесе не қара басыпты қаладағы қазақша жалғыз мектептің түлегін...

Тұрдекең жайлап отырып осылайша біраз шер таркатты. Бірақ қызын Рақымбектің отарына түбінде жақындатсам деген жоспарының қыбын ашқан жоқ.

Рақымбек әлі сұрышталып бөлінбеген, бір бөлегі түбінде мұның қолынан кетуге тиіс мың екі жүз бастай тұсақ бағып отыр екен. Ас желінгенен кейін, күннің қаруы қайта, үй иесі екі итін ілестіріп қойды өріске айдап кетті де, Тұрдекең бешпетін иығына желбегей жамылып, қалпағын шалқайтыңқырай киіп, баспанадан ұзай берді. Қарт сол кеткеннен құмға сіңіп, қыруар уақыт оздырып қайтты.

Өз дәурені дүрілдеп тұрған кезде Тұрдекең бұдан гөрі Жайыққа біртабан жақын канал бойы қатқакты жайлайтын. Бұл тұғырдан түскен соң, кейінгі жылдары, бірнеше жыл қатарынан жаңбыр аз жауып, қуаңшылық белең алып кетті де, шөп түсімінің нашарлығына байланысты шабындық жер молырақ керек болғандықтан, қой жаз құмды етектейтін әдет тапты. Бұл өзгерістің қосымша михнаты, әрине, суға байланысты, себебі, құмның қалың ішіндегідей емес, қазір осы аяқ астынан күрек қадап жіберіп, жатып келіп қазсаң, су көзі ең бері дегенде үш-төрт кісі бойынан білінеді. Құмға бұдан гөрі еңденкірей кіріп қос түгудің мүмкіндігі тағы жоқ: өзге ауданның жері басталар еді.

Әйтсе де: «Жазғы қонысқа, әсіресе қой үшін таптырмайтын жер екен!» — деп келеді қария. Құм мен қырлық жердің шөбі аралас ұшырасты. Өсіп кеткен желкек пен бұйырғын, шағылды етектей жусан түрлері мол еді. Жылғаларды шөлып еді, құмның мол ішінде болатын

қияқ, киікоты сияқты шөп түрлерінің сирек екенін көрді, оның есесіне изен, мортық, қоңырбас, тиіп-қашып адыраспан мен сіргеқара, ойдым-ойдым акселеу мен бидайық өседі екен. Тұрдекең, етігінің құмға милықтай батқанына қарамай, тағы бір-екі шағыл асқысы келген, аяқ астының тосын жұмсақтығынан шығар, тілерсегінің сіңірі созылып ауырды да, жүрісін бұрынғысынан да баяулата қозғалып, үйге қайтты.

Ештеп терлейін деді. Бешпетін ауырлап, түймелерін түгел ағытып қойды.

Бұл күні қонақты әуелі таң қалдырған нәрсе — Рақымбек қойды толық үш сағат та жаймай, күн батардан көп бұрын кері айдап келді. Тұрдекең біраз тыныққан соң сусын ішіп, содан кейін тағы далада бой жазып жүрген. Бір сәт байқаса, қалың қой шағылдан бері асып, еңіске қарай құлап келеді екен. «Апырай, мына шіркіннің қой жаю машығы қызық екен, тіптен! Қызыліңір болмай кері қуып келе жатқаны несі? Әлде, қолындағы қой көп болған соң, қараңғыға қалсам бас-аяғын жинай алмаймын деп әзірше осылай етіп жүр ме? Әлде мен алаңдаттым ба?» деп, түк түсінбей тұр қарт.

Тұрдекең бір сәт, бұлар еңбек етіп жүрген кездегідей емес, қойшы михнатының мықтап жеңілденгенін ойлады. Үйдің іргесінде құдық, құдық басында астауға төніп бөрене тұғырға орнатылған дәу мотор тұр. Құдық қанша терең болғанмен, оны қойшының бұрынғыдай өзі қазбайды, машина қазады. Қарт мана аяғы осы жерге тиісімен байқаған: су керек болғанда Жұмабике шелек алып құдық басына барады да, бірденені жұлқып қалып, мотордың түтінін бұрқ еткізеді. Ізінше суын көтеріп, маң-маң басып кері қайтып келе жатады. Үйдің жанында шамасы сол мың жарым қой тығыздау сиятын ашық далбар қоршалған. Далбардың қақ ортасына биік баған қағылып, басына үлкендігі қос жұдырықтай шам ілінген. Басында одан гөрі кішілеу мөлтілдегі бар төрт-бес қада қоршауды сыртынан қарауылдап тұр. Солардың үйге ең жақынынан жарыса сызылған қос сым түндіктен ішке кіреді. Мана Жұмабике қоршаудың арғы басындағы күркеге бір жақындап кеткенде сол жақтан тағы бір мотор дүкілдеп қоя беріп еді, әлгі шамның бәрі оянды. Келіншек моторды сөндіріп, үйге кіріп бара жатып сөйлеген болатын:

— Өзім ғой әншейін, бұзық болса, кешке сіздің алдыңызда ұятқа қалармыз деп...

— Бұзылып қалған кездерінде бұл моторларды кім ондайды? — деп сұрады Тұрдекең.

— Рақымбектің өзі бірдеңе етіп лекерлеп жүр ғой... Директор көмекшілікке мотордың құрылысын жақсы білетін бір жас бала берем деген білем...

Енді қазір тағы да Жұмабике құдық басына барып, моторды іске қосты. Содан кейін Нұрболатты құдық басына байлады да, екі органшыны ілестіріп қойға қарсы жүрді. Тұрдекең де кенет желпіне көңілденіп, солай қарай қазандай жөнелді. Қарттың көңілі көптен таптырмай опындырып жүрген бір жоғы енді түгенделердей өрепіді. Тек козы жамырап, қой мен төл бірін бірі іздеген кезде шығатын, малмен көзін ашқан пенденің жанына ерекше ыстық та жағымды азан-қазан шу ғана жетіспепті.

Кешкі отырыс көңілді өтті. Тұрдекең майданда жүргенде басынан кешкен, өзі куә болған әр түрлі жайлардан әңгіме қозғап, оның ішінде де көңілділерін теріп айтып, інісі мен келінің күлкіге қарық етті. Өзі күлмейтін адамның байыпшы асықпай айтқан әңгімесіне не жетсін.

Қарт Рақымбекті сауалмен мошқап, ескерту жасап нықыртқан жоқ.

* * *

Рақымбектің сыры да, кеңшар басшысының қартқа неге кенет астындағы көлігін түсіп бергені де Тұрдекең ертеңіне белгілі болды.

Тағы шәй, тамақ ішілгеннен кейін, төсек саларда, қария өзінің, егер масахана болса, сыртқа жатуды қалайтынын айтты. Үй иелері балаларымен ішке жайғасты.

Неге екенін өзі де түсінбейді, Тұрдекең түнімен дөңбекшіп ұйықтай алмай шықты. Ертеңіне төсегінен күн шығардан көп бұрын, елең-алаңмен, тұрды. Денесінің босап, еркін тынығуына құмды жердің салқын самал тынысы да көмектеспеді.

Әдетте, өз үйінде, бұл кезде ол әлі ұйықтап жататын. Бұдан біраз кейін тұрып, кемпіріне сиыр сауысатын, мал өргізетін, сосын қайта төсегін сағалап, әбден шәй дайын болғанда, сағат тоғыздарда, біржола көтерілетін. Ол кезде бала, келін қызметке кетіп қалар еді. Шүмегі салбыраған кішкене немересін ортаға ала, қызықтай отырып, екі қария асықпай шынаяқ шымырлатар еді. Содан кейін барып Тұрдекең үй маңының оны-мұны шаруасына айналар еді.

Қартты байқап тайыншадай екі қара-ала төбет орындарынан тұрып, керіліп-созыла бастады. Ол «шаруаны» тындырған соң қойлы ауыл итінің бір көріп «танысқан» адамына ұмтылмайтын момындығымен екеуі қарттың екі жағынан жақындап, бұланқұйрыққа басты. Ұялас болса керек; сырты күбідей, азулары пышақтай еді. Тұрдекең мен екі ит біріне бірі үздік-создық ілесіп, қойды айналып шықты. Қарт құдық басына барып, мотор мен астауды, ойманың шегенін көрді. Содан кейін үйге тағы бір көз тастады да, бұрынғыша ешкім кіріп-шыға қоймаған соң, кеше кеш қыдырыстап қайтқан бағдарды маңдайға алып жүріп кетті.

Түн баласын көзінен атырғанымен, Тұрдекең бойын сергек сезінеді, сірә, құмның таза ауасы көкірегін ашып, миын оятса керек-ау. Сағаттың үстінде бой жазып, атқа мінгендей болды. «Рахаттың бәрі мұнда екен ғой, мен неғып қамашауға қамалып, ерте отырып қалғам!» деп өкінді. Тағы да сейілдей тұрғысы келген, бірақ: «Оным ерсі-ау, балалар шәйге күтіп қалса... бос отырған отбасы емес» деп, дереу кері қайтты.

Тұрдекең аң-таң: бұдан өзге әлі бір саналы пенде ұйқысынан оянбаған еді. Күн шығып, жер-көкті нұрға орап, үстемелеп қыздыра бастағалы қашан! Қоршаудың ішіндегі қой тынышсызданып, сиыр мөңірейді. Рақымбектің ірі малы біраз көрінді; екі бұзау шағын ашық қораға қамалыпты да, сиыр, қашар, өгіздер бос жүр. Көшелі қызыл-қасқа құнажын қораның қадау есігінен тұмсығын сұғып, өзінен аумайтын бұзауды жалағыштап жатыр.

— Мына көргенсіздер не қылады-ай?! — деп дауыстап жіберді қарт бұдан әрі шыдай алмай, — О заман да бұ заман малды бұлайша баққанды қайдан көрді екен, түге? Жарайды, қойды түнде жаймай-ақ қойсын, біздің ол машығымыз ескірген шығар, ал мыналары не?!

Күн көкжиектен көп көтеріліп кетіп еді. Тұрдекең орнынан шұғыл қозғалып, қазандай басып далбарға барды да, есігін айқара ашты. Қой да тек соны күтіп жатыр екен — лек-легімен шығып, қалыңға қарай бытырай өрлеп, ұзай берді. Қарт аз-кем ойланғандай болып тұрды да, екі бұзауды да шығарып жіберді. Олар енесіне ұмтылды, әсіресе қызыл-қасқа бұзау енесінің иіп тұрған желінін лезде ақ көбікке орап, борпылдаға бастады.

Тұрдекеңнің көңілі біраз көншіп, мал баласына деген манағы мазасыз аянышы тиянақ тапты. Отардан тым алшақтап қиыс бағытқа кеткен он шақты жандықты күнге қарсы қайырды да, қыруар шаруа тындырған, кәдімгідей солықтап қалған қалыппен орағытынқырап кейін қайтты. Шыбын-шіркей өріп, шегіртке шырылдады. «Ал енді мейілдерін, айқұшақ қауысып ұйықтай берің, тындыра алмай жүрген шаруаларың со болса. Қашан күйттеріне сокқанда тұрарсыңдар» деді.

Қарт үйге тура сағат тоғызда, сол күнде шәй ішетін мезгілінде оралды. Келсе, басы қокып Рақымбек төсектен жаңа тұрып отыр екен. Қартқа реніші бар кісіше тыжырынып теріс қарады. Қойға мінетін аттың шідерін қапелімде шеше алмағанын айтып кідіріп келген Нұрболатқа: «Тез қимылдамайсың!» — деп ақырып-жекіріп ұрыса бастады. Атты ерттеп, ер үстіне баласын бір жұлқып қондырды да: «Тез, жаныңның барында, қойды жинақтап, маған хабарын бер!» — деді.

Тұрдекең тіс жарған жоқ. Шәйды бірер шынаяқ қана ішті, Жұмабикенің тағы құйғысы келгеніне қарсылық білдірді. Үй иелері

де отырысты бұдан кейін көп созбады, дастарқан тез жиналды. Нұрболат келіп, Рақымбектің атын өзіне беріп еді, әкесі: «Қой түгел ме?» – деп сұрады. «Білмейім» деді бала. Сол-ақ екен Рақымбек орнынан ұшып тұра сала, баланы білегінен мыта ұстады да, жақтан бір тартып ұшырып түсірді. «Неге білмейсің?!» деді ақырып. Сонан соң атын мініп, кетіп қалды.

Балаға тиген шапалақ Тұрдекең үшін өзіне жұмсалғаннан кем болған жоқ. Інісіне көңілі қатты қалып, келгеннен бері тыныш ішкі сарайы кенет жүдеп кетті. «Жөргектен сүтпен сінбеген қалып пендеге құтаймайды» деді қарт түңіліп. Алды-артына қарамай аттанып кетуге жолы кесулі, теріс қарап жатып қалды.

Рақымбек қойды түске талас айдап келді. Мотордың дүкілдегенінен, Жұмабикенің балаларын шақырып айқайлағанынан Тұрдекең олардың қой суаруға кіріскендерін шамалап жатыр. Бірақ селт етпеді. Енді ол Рақымбек пен Жұмабикеге өкпелеген жоқ, оларды жек көрді. Әлдебір бөгде дыбыс естілгендей болған, кеңшар орталығынан келген, машинаға қондырылған монша екен. Шөпір мен Рақымбек дабырласып үйге кірді. Қарт бұл жолы да қозғалмады, көзі жұмулы еді, ұйықтап жатқан қалып танытты.

Сөйтсе, Тұрдекең шынында да мызғып кетіпті, Рақымбек оятты. «Тұрыңыз, ас дайын болды» деді.

Қарт орынынан самарқау көтеріліп, өзімен ауылдас жас жігіттің сәлемін алды. Нұрболат қолға су күйды да, барлығы асқа жұмылды.

– Қашан кері жүресің, Сайлау шырағым? – деп сұрады Тұрдекең кенет шөпірден.

– Мына Рақандар кідіртпесе, баскалай шаруам жоқ, – деді жас жігіт.

– Жай сұрадыңыз ба? – Рақымбек аузындағы асты шайнамай кідіріп, ағасына қарады.

– Жай емес, – қонақ үй иесіне түнере көз тастағанмен, даусын көтермей ақырын сөйледі. – Осы машинамен үйге қайтам...

– Мәссаған! – Рақымбек шошып кетті. Жұмабике де елеңдеп, саса бастады. – Мұныңыз қалай, қосағасы?! Айлап жатпағанмен, ең құрығанда үш-төрт күн кідірмейсіз бе ақыры келген соң? Басқа-басқа, сыбағаңызды жемейсіз бе?..

– Жата алмаймын, қайтам. Сыбағамды да жеп болғам,

Қанша айтқанмен, Жұмабикеде ес бар екен, еріне ұрыса бастады:

– Бар бәле сенен! Үлкен кісінің көзінше бала сабап, мінез көрсетіп... не істейсің ал енді?

Ертеңгі қалпындай емес, Рақымбек сабасына түсіп қалыпты – картқа жалпылдап, ұятын жуып-шаюға тырысып, кешірім өтініп

жатыр. Бірақ енді мұның бірі де Тұрдекеннің көкірегіндегі салмақты зілдің сызын қайтара алған жоқ.

Жолға жиналып болғаннан кейін, түскі шәй үстінде, қарт әңгіме бастады. Әдетте ол дәйт ашудың, қатты сөздің кісісі емес-ті, кейінірек даусы сесті, қатты шыққанымен, сөзінің басы сабырлы еді.

– Менің ренішім сенің мені сыйламағаныңа байланысты емес, Рақымбек. Олай болған күнде шаруа жеңілденер еді. Менің ренішім сенің малды сыйламағаныңа байланысты, – деп тыныстады. – Қазақтың баласысың ғой, шын білгің келсе: малдың обалы адамның обалынан гөрі салмақтырақ, одан әлдеқайда ауыр. Себебі оның көрген жәбірін жария етіп айтатын, мұнын шағатын, шер тарқатып шағынатын тілі жоқ, немесе қару ұстап шендесетін, белдесетін қолы жоқ; оның сол тұрғаны тұрған. Отқа салсаң, «ойбай, күйдім!» демейді, суға салсаң, «баттым!» демейді, бір жерін тірілей кесіп алсаң, оныға бейіл, сондықтан да малдың обалына шаш жетпек емес. Қала берді, «мал, жан аман ба?» дейді атам қазақ бірінен бірі есендік-саулық сұрағанда, малды алдымен аузына алады. Ұшқалақ қараған кісіге ерсі сияқты. Бірақ ойлап отырсаң, мұнда ешқандай да ерсілік жоқ, қайта үлкен сыр жатыр. Себебі малсыз тірлік болмаған, болмайды да. Сен осыны түсінесің бе?

– Түсінем...

– Мықты түсінетін шығарсың! Түсінсен, бағылмаған, күтім көрмеген малдың итжемеде қор болып, құрттап-биттеп өлетінін ұмытпас едің ғой.

Бұл сөзге үй иесі жауап қатқан жоқ. Қарт оған жазғыра тағы бір қарап алды да, әрі қарай сөйлеп кетті. Оның үні енді ызғар шашып, қатай бастап еді.

– Азаматтың азаматшылығы бүлдірушілігімен, аздырушылығымен емес, бүтіндеушілігімен, жаппай қамқор көңілімен, өзінікі демей, өзгенікі демей бірді екі етем, екіні төрт етем деген тынымсыз тырбынушылығымен танылады, сонымен бағаланады. Ал сенің мына істеп жүргенің не көзбояушылық, не азғындық?! Осы ма бата алғандағың, үмітті ақтағаның?! Сен итті ел қатарына қосып адам еткен, ашылып болған әбүйірінді жапқан, біле білсең, осы мал емес пе еді? Неге ұмытасың мұны!..

Сәл тыныстап, солығын баспастан тағы сөйлеп кетті:

– Кеше келгеннен бері мен аң-таң едім: «Бұ бағып отырғаны ылғи жас мал – тұсақ, құдығы болса сулы, моторы, жалғыз демесең, істеп тұр, – малы неге қонсыз, жадау?!» – деп. Сол сырға мен енді қандым: сен малды жаймайды да, күтпейді де екенсің. Қойының қонды, жүнді болуын ойлаған қай қазақ о заман да бұ заман пілденің қақ ортасында

қойды қамап қойған? Қайдан көрдің, кімнен естідің?! Малының тоқтығын ойлаған қай қазақ ұйқысын қимай, өз күйін күйттеп малды ыссыға қалдырып, тал түске шейін өргізбеген?! Мұның не көргенсіздік? Қай қазақ кемі жарты күн жайылуға тиіс малды шығара сала, кері қуып келе берген?! Кімнен алған бассыздығың бұл?..Осының бәрін мен саған бір емес, мың рет айттым, гәп білмегендікте емес, тырыспағандықта, күл болмаса бұл болсын дегендікте. Сонда сен не бетіңмен шопан атанып, мал бақтым деп жүрсің?! Бұғанасы, тіпті, бекіп үлгермеген құйттай баланы қорлап, өзің істейтінді оған істетіп отырғаның мынау!.. Сау кезінде, жасы үлкеннен именіп қол-аяғыңды жинағанда мынадайсың, араққа әкеңнің құны кеткендей-ақ тойып алып, өз билігің өзіңе түгел тигенде қандай екенсің?! Арақ жағынан, шүкір, оздың ғой, дабысын жер жарады...

Қарт шаршап тоқтады. Біраз отырғаннан кейін Рақымбекке көз салып еді, үй иесінің қабағы қарс жабылып кеткен екен. Тұрдекен оның ішкі пиғылын, бағанадан бергі сөзді қалай қарсы алғанын анық аңғарды да, шешімін айтты:

– «Төрінен көрі жақын осы шалға не жоқ!» деп отырсың, білем. Қателесесің, шырағым! Сенің қолыңдағы, ақ көңіл адамның жақсылыққа сенгіштігімен бір кезде өзім абайсызда саған тапсырған, малдың жайын ойлағанда, сонау орталықта – жердің түбінде жатқан менің ұйқым отардың басындағы сенің ұйқыңнан көп бұзылады. Шал болғанмен, мен әлі абыройды, жұрт алдындағы борышын ойлаудан қалған шал емеспін. Тірі кісі тұрмақ, абырой өлгенге де керек! Және мен босқа келіп отырған жоқпын; директор баланың мәшинасын неге бергені енді түсінікті болды. Бәрін өз көзіммен көрдім, білдім, шешімім біреу: дайындал, малды тапсырасың! – деді.

Сұлқ отырып қалған Рақымбекке де, есіктің қыр көзінде әрі де, бері де жоқ состия тұрып қалған Жұмабикеге де бұдан әрі көңіл бөлген жоқ.

Кешікпей қонақ Сайлаудың көлігімен кеңшар орталығына қайтып кетті.

□ Нақыш

Кейде адамның көлеңкесінің де өзіне сүйеніп, серік болары бар. Бірақ бұл үшін көлеңкеңнің сен күнді маңдайға алсаң ілесіп, бірқырын қадам бассаң жарысып, ал күннен қаппа жүрсең алға түсіп бастап отыруы шарт; ол да өзің сияқты жұмыр бас, ербиген аяқ-қолы, қаздаңдаған жүрісі, қимыл-қозғалысы бар бейне болуы міндет.

Көлеңкесіздік қиын екен! Қалай қарай аттама мейлің, аяғыңның астында – алып қоңыз сияқты ма, тасбақа сияқты ма – бірдеңе қарауытады да, сен қозғалғанда оның да жыбырлағаны болмаса, көсемдік көрсетіп оқшау шықпайды. Осал сәтті аңдыған бәле, жатып атар зымыстан дерсін.

Аспан асты алауға толып кеткендей еді. Сап-сары күн шақырайып тас төбеден аумайды. Ауа қойыла мұнартып, балқып кетуге шақ тұр.

Таңдайы қақсып, басы айналған Бименді жолаушылар залынан шығып, асханаға қарай келе жатқан. Ойы бірер кесе қара шәй ұрттап шөл қайтару болатын. Барар жеріне таяп қалғанда соңынан дауыс шықты:

– Қолыңда сағатың бар көрінеді, шырағым, уақытты айтып жіберші...

Жігіт бұрылып қараса, ақ кенептен бешпет-шалбары, шетен қалпағы бар, ерекше семіз, мыртық мойын, аласа бойлы азамат бұған он бүйірден бір қырын келе жатыр екен. Тура емшектіктен басталған қарны төңкеріліп, бұғағы салбырап, екі аяғы біріне бірі жуықтай алмағандықтан ынтымактаспай, әрқайсысы өз алдына тырпылдап мардымсыз жылжиды. Көп тотықпаған дөңгелек бітімді ақ-сары жүзі ерекше жылы да сабырлы көрінді. Ырс-ырс етіп Бимендіге таяп келіп тоқтады.

– Ассалаумағалайкум! – деп, жігіт өзінен жасы көрнеу үлкен кісіге екі қолын ұсынды.

– Алейкум салам! Сәлемші бала, көп жаса! – деді бейтаныс азамат. Сосын жіңішкелеу ашық даусымен жостыртып шапшаң сөйлеп кетті: – Мына Ақтауға келе жатыр ем. Соңыра жүретін пойызбен Шетпеге кері қайтуым керек еді. Қалаға дейін біраз жер, сенен уақыт біліп, үлгеріп-үлгермейтінімді мөлшерлеп алғым келгені ғой...

– Өзімнің ғана емес, сағатымның да басы айналып қалса керек, аға, жүрмей тұр, – деп, күлген болды Бименді.

– Қай жақтан келе жатқан баласың?